



Barbla Etter: «I vala d'esser cumbattivs.»



Johannes Flury, il president da la Lia Rumantscha.

«Scadina e scadin è dumandà da s'engaschar»

Discussiun da podi: Clom per dapli engaschi e responsabladad en la Rumantschia

DA SANDRO BUCHLI / ANR

■ **Territoris rumantschs sco il Surses, S-chanf, la Muntogna da Schons e la regiun a l'ur da la Surselva pudessan tenor las cifras bainbaud vegnir attribuids a la regiun tudestga dal Grischun.** Il mainadiscussiun *Andri Franziscus* ha fatg attents en la sala prest plaina sin il stadi alarment dal rumantsch e la digren che cuntinuescha constantamain dapi bunamain 200 onns. En blers vitgs vegn il rumantsch negligì, sin level chantunal ignorà, tashentà ed emblidà. Ils participants dal podi han preschentà en curts referats lur ideas davart la politica da lingua, co frenar il svilup dramatic ed han dessignà skizzas per projects concrets.

Tschintg propostas per la Rumantschia

«Solidarità» è stà en il center dal pled da *Gianna Beeli*. «La solidarità stoppia exnum vegnir tgrada e cultivada per impedir ignoranza e desinteress envers autras regiuns idiomaticas», uschia Beeli. La presidenta da la YEN, l'Uniu europeu da las giuventetgnas minoritaras, propona perquai concretamain da pussibilitar barats interculturalis sco part dal curriculum scolastic da mintga Rumantsch: In scolar u ina scolara da la Surselva duai per exempel ir en l'En-

giadina u en il Surmir per in temp e viceversa. Uschia sa stabilischan contacts impurtants ed ina relaziun tar ina regiun che cumbatta cun ils medems problems. Beeli ha era punctuà ch'i saja impurtant che las iniziativa da la giuventetgna vegnan pigliadas serius e betg mo tadladas cun in surrir. «Tut las iniziativa per promover il rumantsch èn impurtantas, i va per sviluppar ina savida critica e da promover uschia la solidarità.»

Per *Gianna Luzio* viva il rumantsch sch'el vegn era duvrà. Per la secretaria generala da la pcd svizra èsi central che mintga singul s'engaschia. «Nus na pudain betg delegar tut la responsabladad a las organizaziuns ed a la politica. Per nossa lingua materna stuain nus sez surpigliar questa responsabladad. «Il rumantsch viva sch'el vegn duvrà. E vegn duvrà sch'el viva.» Luzio propona da lantschar scuntradas regularas cun Rumantschas e Rumantschs en il Grischun ed en la Bassa per avair ina platfurma da discussiuns. «Bleras Rumantschas e blers Rumantschs en la Bassa n'han betg la pussaivladad da far adiever dal rumantsch en lur mintgadi. Perquai èn quists inscuters in instrument impurtant per discutir ils problems actuals.» Per sfrenar il svilup negativ èsi per Luzio per exempel necessari d'avair leschas che pretendan in'in-

strucziun obligatorica dal rumantsch er en vischnancas cun main che 50% dals scolars rumantschs.

Marco Cavegn ha en ses pled rapportà da sias experiensas cun administraziuns communalas e chantunalas. La vischnanca bilingua Ilanz/Glion publitgeschia per exempel las dumondas da bajegiar per tudestg. Era l'administraziun chantunala hagi gist tramiss ad el in quint per la taglia da traffic, sulettamain per tudestg. Cavegn pretendia ch'ins haja uschia strusch pli la chaschun da duvrar il rumantsch sche las instanzas respundan be per tudestg. La lingua perdia uschia reputaziun ed era qualitad. I saja plinavant er da motivar persunas da lingua tudestga d'utilisar il rumantsch ed er far dapli squitsch envers las autoritads.

Jon Pult enonuscha sco anteriur deputà bain ils mecanissem da la politica grischuna. En ses pled fervent diagnostiche el il problem betg mo tar las finanzas chantunalas, mabain er a l'intern da l'administraziun. Là mancan tenor il candidat per il cussegl naziunal d'ina vart simplamain la cunscienza linguistica e da tschella vart ils collavurats rumantschs. «I vegn interperndi bler memia pauc per tschertgar personal rumantsch.» Sia visiun èsi da sviluppar in nov spiert cuminai-vel dals Rumantschs. Perquai saja il

cumbat politic necessari. «Nus ans stuain sa dumandar tge che nus pudain far, e betg tge ch'ils auters pon far per nus tenor il pled da l'antier president american John F. Kennedy: «ask not what your country can do for you – ask what you can do for your country. «Far insatge per la cuminanza è la posiziun emancipatorica che nus stuain avair per il success.» Tenor Pult han Rumantschas e Rumantschs la pussaivladad da mussar a la Svizra ed al mund ina ferma identitad bilingua senza esser xenofobs e naziunalistics sco ambassadurs da diversitad culturala e sco avantguardia d'ina minoritad averta.

«Mintga Rumantscha e mintga Rumantsch duai far ses pussaivel per il rumantsch.» La magistra *Annalea Stuppan* parta en ses pled da quist patratg: «Dar il pled a tschel, esser averts e tolerants, far il pussaivel e betg valetar e crititgar tschels.» Tenor Stuppan dettia quai avunda uniuns per communitgar avertamain, dir insatge, tranteren er «dar in check», dentant restar fairs, avair fiduzia vicendaivla en l'auter. Las feridas che las discussiuns enturn il rumantsch grischun hajan chaschunà sajan grondas. «I na dastga simplamain betg esser pli in tabu dad esser pro u cunter il rumantsch grischun.» La visiun da Stuppan èsi dad esser averts per ideas novas ed il giavisch che mintgina

e mintgin s'engaschia en il rom da sias pussaivladads. En il center sto dentant star il plaschair, e betg il «stuir». Dar vinavant entusiassem e plaschair per il rumantsch, quai è il principal per tut l'engaschi.»

Visiuns pretendan lavur

L'unda da simpatia ch'il rumantsch guida en la Svizra èsi da nizzegiar e da sa metter a la lavur, sco che Pult di: «Quist es lavur da mintgadi, engaschi politic e betg sulettamain visiuns.» Uschia èsi per Pult existenzial ch'il rumantsch survegnia ina summa relevanta dals radund 40 milliuns francs che vegnan proximamain repartids tenor la nova strategia chantunala da la digitalisaziun.

Da la discussiun da podi è resorti cleramain il clom per dapli engaschi da mintgin. Sco che *Barbla Etter* resume-scha en il pled conclusiv: «I vala d'esser cumbattivs, scriver e discurren rumantsch uschè bler sco pussaivel, betg delegar tut a la Lia Rumantscha ed ad ultras instituziuns, tschertgar il dialog, chattar soluziuns, mintgin fa sia part.» A la Pro Svizra Rumantscha èsi cun l'organizaziun dal podi gartegià da dar accents per il svilup dal linguatg. I sa tracta d'impuls constructivs, concrets e positivs che pudessan dar ina cunterpaisa per fermar la discriminaziun successiva dal rumantsch en tut ils secturs.



Annalea Stuppan: «Esser averts e tolerants.»



Jon Pult: «Mintga Rumantsch(a) duai far il pussaivel.»